

NAQQIUT

Inatsisartut inatsisissaattut siunnersuut 12. august 2016 ullulerneqartoq taarsissavaa

(Inatsisartut Allattoqarfiannit innersuussisoqarnerata kinguneranik inatsisissatut siunnersuutip kalaallisoortaani oqaatsitigut naqqiuteqartoqarpoq. Inatsisissatut siunnersuummi aalajangersakkat ilaanni oqaatsitigut naqqiuteqartoqarpoq, kiisalu naqqiuteqarnerup kingunerisaanik oqaaseqaatini nalinginnaasuni iluarsisioqarpoq.)

Uunga siunnersuut: Isertitanit akileraarutit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx.xx 2016-imeersoq
(Aningaasaqarnermut Aatsitassanullu Naalakkersuisoq)

Saqqummiussissut

(Aningaasaqarnermut Aatsitassanullu Naalakkersuisoq)

Siullermeerneqarnera

Matumuuna isertitanit akileraarutit pillugit Inatsisartut inatsisaata allanngortinneqarnera pillugu Inatsisartut inatsisissaattut siunnersuut Naalakkersuisut sinnerlugit saqqummiutissavara.

Inatsisissatut siunnersuut una, Naalakkersuisut inuussutissarsiutitigut siuarsaaniarnerminni politikkiannut ilaasutut, kiisalu soraarnerussutisiaqartarneq pillugu inatsisitigut ineriartortitsinerumt ilaasutut isigineqassaaq, siullermik UKA 2015-imi utoqqalinersiaqarneq pillugu inatsisip aaqqissuuteqqinneqarneranik aallartittumik UPA 2016-imilu soraarnerussutisiaqarnissamut aaqqissuussinernut nunani allaniittunut akiliinikkut akileraarusersuisarnissap akuerineqarneranik malitseqartinneqartumik. Inatsisissatut siunnersuutip pineqartup pingaarnertut siunertaraa nunatsinni soraarnerussutisiaqarnissamut sillimmasiinermullu nioqqutinik aningaaserivinnik nioqqutigineqartunik naleqqussaanissaq.

Soraarnerussutisiaqarnissaq siunertaralugu aningaaserivinni, Kalaallit Nunaanni angerlarsimaffeqartuni imaluunniit Kalaallit Nunaanni ingerlatsisuni, ileqqaarsinnaalernissaq siunnersuutip piviusunngortissavaa. Soraarnerussutisiaqarnissamut aningaaserivimmiittuutillip nammineq ileqqaakkani tamaasa imaluunniit ilai pappilissanut nalilinnut aningaasaliissutigisinnaavai, imaluunniit tamanna pillugu isumaqatigiissuteqarluni.

Siunnersuutip nassataraa, soraarnerussutisiaqarnissaq siunertaralugu ileqqaakkanik aningaasaliisinnaaneq pillugu piumasaqaateqartoqarnera. Aningaasaliinermi

isumannaatsuunissaq peqqutigalugu assersuutigalugu ingerlatseqatigiiffinni, ileqqaartup nammineq imaluunniit taassuma ilaqutaasa ingerlatseqatigiiffiup 25 procentia annerusorluunniit pigippagu aningaasaliiffiqeqarsinnaangilaq. Tamatuminnga ileqqaarutit piginnittup aningaasaqarnerata sinneranut immikkoortinniarneqarput.

Tamatuma saniatigut inatsisissatut siunnersuut pinngitsoorani soraarnerussutisiaqarnissamut ileqqaartarnissap eqqunneqarnissaa pillugu inatsisissatut siunnersuummut saqqummiunneqartumut atasutut isigineqassaaq.

Sulisitsisut kissateqarnerannik aamma siunnersuutigineqarpoq suliffeqarfinni kinguaariinnut tullernut nikisitsinermut atatillugu malittarisassat oqilisarneqassasut. Allanguutit kinguaariinnut tullernut nikisitsinermut atatillugu akileraarusiinissamik kinguartitsinermi aningaasanut killiliussaq maannakkut 100.000 kr.-init 350.000 kr.-inut qaffannissaannut periarfissanut iluaqutaassaaq. Allanguut isumaqarpoq assersuutigalugu, aktiaatileqatigiiffimmi imaluunniit piginneqatigiiffimmi sulisup akissarsiaanit 350.000 kr.-t angullugit, ”kinguaariinnut tullernut nikinnermi aktiat imaluunniit piginneqataassutsit” pisisarinerani atorineqartut, ukiumi isertitaqarfimmi allami akileraarusernissaat kinguartinneqarsinnaasoq.

Siunnersuummi aamma isigineqassaaq, kinguaariinnut tullernut nikinnermut atatillugu aaqqiineq ullumikkut taamaallaat annikitsuinnarmik atorineqartarmat.

Kiisalu inatsisissatut siunnersuutip Isertitanit akileraarutit pillugit Inatsisartut inatsisaata allanngortinneqarnera pillugu Inatsisartut inatsisissaattut siunnersuut nr. 7, 6. juni 2016-imeersup siunertaanngitsumik kinguneqaatai aaqqinniarpai. Inatsisip akuerineqarnerata kingorna Naalakkersuisut uparuarneqarput, boligsikringinik, siusinaarluni suliunnaarnersiutinik utoqqalinersianillu tigusisartut ilai, tigusartagai 2017-imit ilanngarneqassasut, malittarisassat nutaat kingunerannik maannakkut isertitaasa naatsorsorneqarneri qaffassammata, naleqq. soraarnerussutisiaqarnissamut aaqqissuussinerit nunani allaniittunut akiliineri 1. Januar 2017 aallarnerfigalugu ilanngaasigassaajunnaassammata. Inatsimmik tamanna anguniarneqanngilaq. Taamaattumik Naalakkersuisut siunnersuutigaat, inatsisissatut siunnersuummi matumani, aaqqiissummik aaqqiisoqassasoq, Inatsisartut inatsisaata nr. 7, 6 juni 2016-imeersup kingunerisaanik, boligsikringinik, siusinaarluni suliunnaarnersiutinik utoqqalinersianillu tigusisartut atugaasa ajornerulinnginnissaat qulakkeerneqassasoq.

Naggataatigut inatsisissatut siunnersuummut oqaaseqaatinullu tassunga tunngasunut innersuutissavassi.

Taamatut oqaaseqaateqarlunga Naalakkersuisut sinnerlugit siunnersuut Inatsisartunut suliassanngortippara.